

三朝遼事實錄

三朝遼事實錄卷之十七

黎陽王在晉明初父編男會苾穉薊父較閼

金
紀

丁卯天啓七年正月吏部等衙門會議得經撫並用九

年於茲每因事權不一以致意見參差往轍可鑒夫
關內關外一體原不宜分爲兩截宜令撫臣袁崇煥
兼制山海兵將聽其調度錢糧聽其稽核戰守方略
聽其指授而一切訓練城守分理榆關事務仍屬之
道臣王應豸此外則內鎮臣方奉天子之威靈矢
公慎以綜核兵糧一時弊竇肅清人心帖服聞鳴泰
奉命總督薊遼賜履所及原跨兩河策應調援自

其職掌無俟廟議責成合無將王之臣加太子太保
兵部尚書回部協理部務督臣閻鳴泰無事照舊駐
札薊鎮有警移駐關門撫臣袁崇煥兼制山海道臣
王應豸加山東按察司副使分理榆關事恭候 命
下一體欽遵施行

聖諭朕聞師克在和事立惟豫人臣同德以揆策廟
堂慮事而制宜中外寧有異心官府原屬一體不謂
自有遼事以來鮮由斯道始因文武不和而河東淪
於腥羶繼因經撫不和而河西鞠爲榛莽覆車之轍
炯然可鑒近賴嚴臣矢忠幹國殫慮邊籌供億多方

邊庭有備逆奴旣已天殛恢復次第可期乃督臣撫
臣爲封疆起見各執一說雖經權奇正無一成之心
意見未符差有異同之跡朕前已有屢旨開諭再三
復命親近內臣前去鎮守調劑雖切猶未釋然念此
封疆兩大臣皆自奪情起復特簡出於朕心宗社恃
以安危安攘咸所倚賴其總兵滿桂俱在山海關等
處駐札一切兵機進止章奏文移俱會同督撫計議
而行寧遠有事則山海速行接應山海有事則寧遠
速行防護如家督捍主亞族心如率然衛身首尾相
應細心料理期保無慮朕又思劉應坤紀用閭鳴泰

袁崇煥從來意氣相信肝膽與同謀略總期爲國奏
疏不約而合成績漸著深可嘉尚朕旣鑒往日不和
之弊復計及邊防處置之宜乃加意調劑至此其在
內外諸臣各要合心若不亟爲區畫恐見解互異議
論滋煩畛域漸生事權多掣封疆大計之謂何是以
慮及京師根本重地已允卿等會議將督臣王之臣
加銜回部以備帷幄之中不時籌策其督臣閻鳴泰
無事之時仍在薊鎮駐劄遇有聲息便速赴關門策
應撫臣袁崇煥內鎮臣紀用俱着便宜行事并道臣
畢自肅總兵趙率教俱在寧遠等處駐扎至關門兵

馬俱聽袁崇煥調度內鎮臣劉應坤着便宜行事并
道臣王應豸合力克復全遼蚤建膚功紆朕東顧策
勲飲至具有彝章如或沉溺故習蹈襲覆轍則我
祖宗三尺具在朕何敢私因念文武二途責在兩部
疆圉弗靖具軫於懷尚思篤念樹功以副朕意特諭
聖諭朕惟謀國之誼中外比之同舟用兵之形犄角
方於捕鹿蠹茲逆奴犯順十載恥歷三朝東顧足憂
實勞宵旰念毛帥獨奮孤忠支撐海外遠提帥旅閱
歷當時乃中朝實倚爲輔車而去撫每視爲秦越疾
聲莫應供億不敷枕甲荷戈有枵腹呼庚之困陪臣

中使
驛

屬國苦資糧屢屨之供乃於百凡艱危之中尚有累
次俘獲之績似此苦心朕且嘉且憫卽今逆奴天誅
而叛孽尚懷叵測朕志復祖宗封疆遠念將士勤苦
其所處皮島一帶地方實牽制勦除要着去冬該鎮
曾有請計內臣駐扎之奏朕熟思審處久未施行今
特命總督登津鎮守海外等處便宜行事太監一員
御馬監太監胡良輔提督登津副鎮守海外等處太
監一員御馬監太監苗成中軍太監二員御馬監太
監金捷郭尚禮都着在於皮島等處地方駐扎督催
餉運查核錢糧清汰老弱選練精強一應戰守機宜

軍務事情着與毛帥和衷協力計議妥確而行不得
輕易紛更亦不許膠執故套更要不時牽掣相機勦
除期奏犁庭掃穴之勲朕何靳錫盟帶礪之典凡有
戰獲捷功照前一一解級如遇偵揆機密事情及島
中戰守聲息緩急即便據實直寫星馳密奏以慰朕
懷

兵部奉 旨毛文龍提兵海外蓄銳多年常思滅虜
恢復以報國今聞奴子蠢動精銳西來巢穴必虛宜
秣馬勵兵長驅直搗以截斯醜之歸路以作後勁於
關門度該帥義勇夙心計必出此你部卽刻差人傳

諭知道還着水陸倍道速達朕旨有功之日破格優
酬卿等亦各矢忠猷預商制勝之策以副朕東顧之
虞○兵部復奏領揆獲捷奉

聖旨連雲島之捷雖斬獲無幾而撫道伐謀之方略
將士用命之勞苦亦宜敘酬李嵩岳駿聲俱着加一
級楊國棟再加一級其餘分別陞賞

朝鮮國陪臣金蒙憲等呈稱小邦兵單糧少苦無援
助平日所仰望者惟天朝而已今則海路陷絕援
急不能赴號而毛鎮又兵疲食缺自知氣勢不振江
水將合則當入保海島以爲避兵之計非但賊來不

能飛到毛管看毛鎮亦無由出陸以見虜馬况望其
協濟小邦之急乎以此料小邦安危存亡不可知也
小邦爲天朝守職盡分向年柳河之役已與奴結
釁構怨又以毛鎮藉在小邦奴之必吞噬小邦者其
心豈頃刻忘也直以內憚關門寧遠之勢顧念巢穴
不敢逞以迨新酋國事之始因喪出弔無故講款陽
緩關寧之師乘機驟發悉銳東向蹂躪我城池虔劉
我士民窺戰我王京此其勢豈獨欲制小邦而已
乎小邦一日不支則毛鎮一日亦無所依着毛鎮無
所依着則彼時皇朝疆場之憂又不止於今日也

誠及此時速發偏師乘其空虛擣其巢穴使賊首尾牽掣俱莫能救則一舉而全遼可復屬國可全羣醜可滅此正難得不可失之機會也堂堂 皇朝 廟算已定區區小邦陪臣不敢妄陳然而芻蕘之言聖人擇焉

二月遼撫袁崇煥陳奏夷情奉

聖旨覽奏夷使恭順求欵之情似真然必彼確有所獻以自贖我確有所憑以相信自非然者誠僞未可必也還遵前旨從容講折務求妥當方爲題請本中說周爲之備不墮反間具見成畫深慰朕懷

奴兵
攻毛
助倭
朝鮮

三月登萊巡撫李嵩塘報准總兵毛文龍揭帖報義
州節度使八九日間累次着人與奴酋說河水一開
毛都督兵馬多至江去請汗來拿毛都甚是不難我
們糧草多備專等汗來奴酋慮他奸細未肯輕信○
奴兵破雲從鐵山文龍將士聞之洶洶不安毛永顯
先逃叅將高萬重統衆劉璋劫島中軍民財物婦女
同麾下七百餘人駕船逃去都司馬承勛亦領六百
餘人由陸奔○文龍揭六年十一月二十七日奴賊
收拾兵馬犯關搶奪從鍊山等處職卽先發各島兵
馬至江樟制相機勦殺隨帶領官兵親身督戰不意

麗人向恨遼民擾害暗爲奴賊奸細引賊俱換麗帽
麗服將沿途撥夜盡行截殺正月十四日奴兵八萬
餘衆大王子帶領四萬餘賊直搶鍊山圍職衙門按
尋要活拿職職至雲從不得拿住毛有俊哄言不傷
你命不害你家一人只要領我活拿毛都督與你大
將官做毛有俊拔刀自刎咽喉已破大半尚不絕命
防守鍊山都司劉文舉領兵撲殺一陣不肯順服賊
恨殺之兵民逃竄賊來招撫不殺大王子領帶四萬
賊馳雲從聞報卽同南北官兵星馳去住關口火器
堅守奴賊下營安息不殺一人職料賊必入皮島圍

困十五夜間差內丁都司毛有見有德尤景和等各帶兵一千鎗炮火器分路衝打時賊勞苦不備打死約有數百賊各奔上山逃叛毛有見毛有德俱着箭陣亡損兵七百餘名十六日大王子急調鉄山六王子兵來云務要併力夾攻活拿職去職向收下降夷并陣上拿來活夷共有二千三百餘名十七日夜間放火燒屋內廳外合職當將撥兵盡數殺完火兵盡發過江牽制手下雖有三百餘兵爲賊斷絕糧道噉噉無食借得客商麥豈分給一碗半碗決不能空腹赴關惟以疑兵出沒安意靜候激勵南北將士堅壁

守以待戰。賊坐困。多日不能前。犯十數日。退回宣州。下營口。恨麗官麗人。你說活拿毛都督。不難。今我馬跑。死兵又打。死毛都督。又拿不到手。爲何死。活纏哄我來。你定是奸細。賊卽開刀殺人。麗人皆剃頭。歸服。二十日。兩王子領兵攻下郭山。殺死麗兵六萬。燒燬糧米百餘萬石。隨去殺義州節制使。竟攻安州等處。職卽差都司毛永詩等收拾鉄山宣州殘兵。親領南北將官陳繼盛項選毛承祿等各帶兵丁火器。星夜出一間道。分派各將各處埋伏。揆賊攻麗勝負相機。以截其後。職又令管侍調昌城滿浦兵馬。督令遊

擊曲承恩等堵截安州責令相機與賊死戰但糧草
斷絕兵帶死馬牛肉爲飽可憐職向爲天朝接濟
不及不能不取給於麗今彼報奴害職職無復向麗
人開口之理伏乞上臺速速發糧救濟以全江東一
帶終牽制進剿之局奴來犯搶一番殺傷不滿萬人
惟麗人麗官自己作孽受禍亦不爲少雖追兵勝負
未知嗣後再報

袁崇煥奏報夷情奉

聖旨該撫發水兵爲東江之援漢得犄角之勢兵本
陰道難以陽言戰守之具該撫實修其可陽言以稱

朕意其靜定需時近於陰者以聽該撫總求着實可恃萬分無虞以保熾疆

兵部飛報虜情奉

聖旨覽奏奴兵東襲毛帥銳氣未傷深慰朕懷麗人導奴入境固自作孽但屬國不支折而入奴奴勢益張亦非吾利還速諭毛帥相機應援無懷宿嫌致誤大計饑軍需餉甚急着登撫暫那青登萊三府倉儲乘風刻日開帆接濟其動支贓銀以勵戎士速發硝黃以壯軍聲委係日前急着上緊傳登撫如議行兵部覆議援朝鮮事宜奉

聖旨登寧與海外互爲犄角毛帥拚死禦敵疾呼不
應何以鼓任事之氣矧策應海外正以綢繆爲封疆
大計宜揀爲急着覽奏說覺華島精選水兵三千星
馳赴援天津登萊堪戰將士刻期出海俱聽毛帥相
機進止說得是着卽行與各該撫鎮速爲督發仍將
發兵日期奏報以慰朕懷

兵部題奴之遠掠東江也蓋啣枚疾趨出鮮不意是
以鮮人幾不支毛帥幾無措而我策應之師亦幾乎
苦於鞭長之難及也臣於三月廿三日閱登撫寧撫
諸塘報知東江漸有可爲者曩竊虞鮮之以力屈降

奴也今報昌城太守不肯歸奴誓與毛帥同心守土
地方安堵無恙則鮮人忠義斷不爲奴用柴可知矣
曩又竊虞鮮之不能以猝備應奴也今報瓶山一陣
奴兵大敗有達王一個被烏銃打壞一目駭回藤布
川存下黃州一陣達馬之歿於鉄靈角刺馬鎗者無
算奴兵之歿於鋒鏑者亦無算從此而鮮之神氣不
愈旺奴之魂魄不愈落乎雖賊兵逼近王京八十里
然我旣駐重兵於河如必不敢渡如渡則乘其半渡
而擊之正鮮所以制奴之歿命也曩又竊虞毛帥之
一旅孤懸未易擊奴也今報瓊山伏兵截奴糧道殺

滅達賊數百奪奴糧米并牛七八十頭毛帥之出奇制勝因糧於敵是尤足以鼓我軍之敵愾而褫奴之膽也此在毛帥與鮮固皆屹然有足恃者遼撫自奉搗巢之命除寧遠城守重兵照舊屯住直於各營中挑選精銳分作連珠三營所簡大將及諸將則老成知勇之趙率教左輔朱梅等也監軍則以夙嫻方略之畢自肅以此而批亢搗虛謀出萬全諸臣自饒爲之且滿桂又簡精騎三千移駐前屯策應又發水兵千人駕帆向東似此水陸夾攻聲靈不亦甚赫濯矣哉奴有不旋懼而急撤其犯鮮之兵以自顧其巢

六者必非情也

兵部塘報奉

聖旨奴兵東犯朝鮮必不能支若鮮折入奴則奴勢益張矣着馬上差人說與寧遠撫臣乘奴遠掠巢虛之時挑選關寧精銳擇智勇之將輕兵直搗大兵陳河續濟以牽奴後而紓屬國之急其糗糧犒賞師行必需戶兵二部亦宜速議處置毋得遲緩坐失事機遼撫袁崇煥奏夷兵東犯朝鮮必留重兵自守以防我防虜使我不能掄然我又何得不救臣等議定于關外三軍營及前鋒三營撫鎮標下四營每營選精

兵九百而寧遠守城之兵未敢輕動分作連珠三營
以左輔金國奇靳國臣趙率教張得勝孫繼武朱梅
黃士英孫紹祖分爲前鋒居中後勁寧遠道臣畢自
肅爲監軍進逼三分河爲搗巢之本蓋各營精銳聞
東警日皆已駐防於大雙松吉之間矣又行總兵滿
桂簡精騎三千駐前屯寧遠策應水陸夾攻夷卽悍
安得不撤犯鮮之兵以西防耶

遼撫援鮮佈置極其可觀乃官軍望河而止此真
所謂紙上之兵也遼兵果可用耶

四月毛文龍報稱奴子今年突犯東江皆因西邊講

和關上兵馬自然不動募地擒職到手闖關直入不
難今奴不但擒職不去將頭發兵馬困在麗地二發
兵馬又困在沿江無可渡處處被職官兵中擊殺傷
無數每日拉屍山頭火堆山堆燒化骨石火光焰天
活擒韃子每日必有解驗據北所密報萬分真確新
汗手下兵馬不滿一萬俱是心寒膽怯長怕西邊大
兵直搗今寧遠又該奮勇統大兵直渡三岔徑搗瀋
陽狡奴自無噍類矣此甚大機會斷不可蹉過若不
以爲然每年虛費金錢三百萬文被狡奴所欺天朝
要和必與我每人金子三兩一隻狗也要作一人賞

到全全依他不顧民膏脂之已竭。祖宗二百餘年之恥何時而雪也。伏乞各上台火速移文寧遠乘職官兵困住達賊大舉進剿。全遼指日可復矣。

遼東總兵趙率教報正月十四日奴酋過江攻克愛州宣州鉄山定州一帶地方。朝鮮將二道江攔開賊在夾江內安營。看得正月望日二處回鄉人魏天真等相離七日。奴即下三城。魏天真離彼至此。又逾一月。奴兵之荼毒毛鎮不待言矣。蓋鉄山即毛鎮所居之地。愛州夜襲不防而失。不知鉄山准備何如。奴子辦管父業即擄掠西虜。壞我藩籬。聲西擊東。攻我屬

邦何異老奴昔年攻金台什白羊骨故事惟亟修備
以俟賊來大戰除與內鎮部院公議一面發水兵三
營揚帆東援整理前鋒後勁兵馬相時進止○登撫
李嵩報二月初二日把總俞文相到北信口往復州
地方見男婦一羣奔走盤問乃鉄山難民因奴酋過
江至愛州從水關進城守城官逃麗人引路圍住鉄
山殺歿兵民不計其數十八日渡江去等情看得奴
子蓄謀最狡大隊長驅張虛聲於河上分兵暗襲肆
慘殺於鉄山海蓋間非圍獵之地屯兵於此其覬覦
海上諸島可知也○毛文龍奏奴賊到朝鮮定州速

送差胡自言動兵之故其書紙曰大金國二王子同
衆王致紙于國王我先老汗歸天有勢如南國尚來
弔又賫禮來賀新汗我先汗與你國毫無不好心腸
你國無一人弔賀因此我國方統大兵來你要和好
差官速來講○兵部題奴子旣搖尾求欸矣何以東
江之兵竟斲枚而疾趨也則求欸者詒我也奴兵旣
捲甲東掠矣何以漫台什四夷又逍遙而渡河則敢
來者輕我也是必回鄉東攻之報無據而後可若其
確也則方金納等九人尚可使之颺去哉

登撫李嵩

准朝鮮國王咨本年正月十七日平安

道按察使尹暄狀啓奴賊數萬騎乘夜猝犯義州城中不覺兵至措手不及城遂陷沒節制使李筦以下文武將官及兵民男婦悉爲所殺先鋒已到州續據前後馳啓賊兵連郭山凌漢山城及安州等城節度使臣防禦使金浚等將吏數十員兵民數萬口屠殺無遺平壤黃州不戰自潰賊兵已到中和游騎出入黃鳳之間賊兵又以一枝向雲從島要搶毛鎮道路阻絕哨探難通勝敗聲息無從聞知等因得此當職切照伊賊自未叛天朝其朶頗於敝邦久矣旣得遼土勢益熾大兼以毛鎮寓在敝疆日夕耽耽欲肆

吞噬顧念奴酋在時其志專在西犯不暇他及故得
拖過數年頃聞旣死酋子繼襲邊吏刺探賊情聞密
計作事與哈赤有異必欲先來東搶且聞天朝爲
羈縻之計撫議已成若尔則渠旣息西犯之意慮其
肆毒於敵邦民窮兵弱金乏力盡雖綢繆有素而陰
雨難防大賊猝至無以抵當長驅直上已逼內地豕
突之勢豈能遏止乃於本月二十六日賊且及王京
城士民遷於江華以避賊鋒君臣播越寄命孤島危
亡之禍迫在朝夕在壬辰倭賊之難幸賴天朝拯
救之恩將以收復舊物目今全遼失陷漢路已絕雖

欲控訴大邦何可得也西望長慟不知所爲竊念此
賊既動大兵東來雖屢戰乘勝然其攻打城池折損
亦多深入麗國兵連禍結其巢穴必已虛弱若蒙
皇朝乘此機便發十方大兵直搗遼瀋舟師由旅順
海路以取金復等州則伊賊千里奔鄉氣踰力窮其
破之必矣夫然則皇朝獲全勝之利而毛鎮紆窘
迫之患敵邦亦收燼余保聚疆域計莫便焉幸莫大
焉敵邦之微弱已甚惟區區一腔忠義自盡事君之
誠結怨強虜遭此橫虐雖至顛沛自顧無媿徒以積
受皇朝厚恩未能報効爲恨耳疆事方殷不得不

發使具奏姑差行獲軍黃泊司果宋興福通官朴庚
生姜應信等前去告急惟興卽轉奏施行等因移咨
到臣該臣看朝鮮之結怨於奴也以鮮之服事我而
不從奴也隔關而遠交奴忌之矣關寧在前樂浪在
後奴實有意西向而惡其尾也則今之殘鮮也洩其
忌且惡并剪其尾也謀亦甚狡矣今據該國告急咨
文其君若臣播越窮島以避奴鋒岌岌乎有不可支
之勢夫鮮實以事我繫奴則我自當擊奴援鮮無待
再計者除臣檄行鎮道催督前發應援官兵梁汝霖
袁進等駕船星赴協同毛帥相機應援務獲全勝又

咨行該國收合精銳奮勇直前力遏強敵期剪逐奴氛俟有聲息另報謹轉奏以聞奉

聖旨覽奏屬國危急君臣播遷朕心惻然該鎮發兵調援具見方略知道了向日款議雖寧鎮別有決心在中朝原未嘗許今日關寧別無調度何以明不爲狡奴所縻無爲屬國口實乎戶兵二部關寧二鎮作速從長計議回奏

兵科李魯生題昨者方金納之來人人背知其詐豈寧撫而知不及此第欲因而用之以行吾間而不意奴因用我之間以間我也一介之行李西來十萬之

戈鋌東指羽書介馬而馳信使緩轡而歸直玩弄我
於掌股之上而全無一毫之忌憚也。搖尾乎乞憐乎。
往事成夢牢猶可補恥則必奮懼而思。嗚此志士腐
心之時而壯夫枕戈之日也。朝鮮我數百年之屬國
往昔被倭亦我拯而存之。今者奴衬鮮曰彼爲我受
衬也可但已乎。且我有鮮與無鮮孰利而奴得鮮與
不得鮮孰害則我救鮮非爲鮮也。自爲也。據鮮咨云
奴雖悉銳而來中亦損傷過多千里遼利兵法所忌
我誠征鼓於河上登鎮舟師掛布帆而東毛帥聞之
必且士氣百倍朝鮮君臣知萬有一生之暘返戈相

向事未可知奴腹背皆敵勢必狼顧料必還而自救如是則鮮可存鮮存而奴東顧是亦中國之利也

大監劉應坤題奴孽東侵誼切同舟水兵東援於本月初三日西回稱奴兵正月初攻高麗其衆不下五六萬餘蓋揣毛鎮孤懸又兼糧乏而海上援師難出是以勢成破竹雖得四道以麗人素弱不格所致嗣緣關津水兵漸集聯帆海嶠砲聲疊震毛鎮復乘間出奇屢有擒斬深入賊爲寒心因而王京獲守賊卽掣黃安定州三萬衆從昌城滿浦潛歸瀋陽惟留千家庄義州弼串堡爲大小王子統領哇兒哈并西夷

投降麗人共二萬餘沿江農種國王李侗幸避而復
返蓋自芝蔴灣乘風開洋以東所歷廣鹿石城獐子
皮島等處何島非船何船非兵應援聲勢業已震驚
於萬里波濤遠近間矣於海道中又見山東糧船一
百二十餘隻鱗次而進又聞有內鎮胡太府亦有兵
丁鎗砲器械糧餉過海軍民踴躍萬倍奴賊雖黠其
能不返顧乎所以撤衆歸藩以致屬國之獲全也
袁崇煥題慨自河西失陷縮守關門無論失地示弱
卽關門亦控扼山谿耳何能屯養十三萬兵馬雖進
而寧前四城金湯長二百里但北負山南負海狹不

三四十里屯兵六萬馬三萬商民數十萬於中地隘
人稠猶之屯十萬兵於山海也地不廣則無以爲耕
資生少具一靠於內地供給貧瘠而士馬不强且人
畜錯雜災沴易生故築錦州中左大凌三城而拓地
一百七十里之不可以已也自中左所以東漸寬錦
州大凌南北而東西相方四城完固屯兵民於中且
耕且練賊來我坐而勝賊不來彼坐而固此三城之
必築者也業已移兵民於三城之間廣開屯種倘城
不完而賊至不得不撤回兵民共保寧前則一年屯
種恐以委敵人失食而愈貧年審一年寧前必不可

守是三城之完不完天下之安危係之此三城不得不築築而立刻當完者也錦州三城若成有進無退全遼卽在目中乘彼有事東江且以款之說緩之而刻日修築令彼掩耳不及待其警覺而我險已成三城成戍守又在關門四百里外重障萬全此時夷卽來說款而我更加重矣

宣府報插漢王子從原巢尚未起身有哈喇慎家夷酋帶領小部夷帳房牛羊馬匹於三月二十三日從奢兒城搬移地方五喇哈哈住牧我省台吉等亦於本月從奢兒城搬移地方亦地都一帶四散住扎各

酋聯絡以備虎酋等情張家口報夷酋青把都男來
洪大台吉說稱插漢上馬要犯獨石一帶口子又薊
遼軍門塘報有沙葷肖那二等稟插漢兒因與裏面
不和帶領人馬十萬前來攻搶你裏邊疆土嚴謹隄
防不可玩忽等因據此看得插酋僻處東隅與宣風
馬牛不相及今橫生枝節控弦十萬加於白言等部
如千鈞之壓卵勢必無幸且恐其聲東擊西在我內
地各嚴爲設備以待之可耳○兵部奏插酋與白寧
皆我款夷也插酋向以講討人口不遂心懷仇恨久
矣今一旦擁兵十萬壓哈喇之境哈喇諸酋其能支

乎今諸酋情急求助於我我若助哈喇則虎酋必肆
螫於我不助則哈酋不能無怨合行督撫諸臣選敏
辦通官出口以和解爲名若得說而罷之此上計也
卽不然我亦有詞於彼沿邊文武將吏仍當處處設
備着實料理不得謂兩酋素飲我餌其自相蠶食原
莫予毒也

上以東師屢捷運餉接濟尚恐不敷着戶部將應補
餉銀十萬兩登津各運米五萬石刻期前發關西兵
馬着再選水兵數千策應以壯聲援
太監劉應坤增定大帥疏奉

聖旨奴酋東侵震隣孔亟朕與股臣浚切綢繆之慮
這本所奏增定大帥分派信地具見先事預圖聲勢
聯絡濱裨邊計杜文煥特加制勅駐寧遠尤世祿駐
錦州侯世祿駐前屯左輔加總兵職銜駐大凌河管
前鋒事滿桂照舊駐札關內節制四鎮及燕建四路
仍賜劔以重事權增八千額兵添買馬二萬餘匹都
屬急着兵餉馬價作何設處該部俱作速議覆回奏
遼撫袁崇煥直陳虜情疏奉

聖旨所奏夷虜情形知道了奴酋狡譎百端就來廝
殺之言詐也宜暇以應之無爲危言所喝喇嘛講款

竊經

之書更詐也更宜整以備之無爲遜言所愚西虜撫
賞用心查核無致虛冒濫惡以生携貳至於虎酋爲
杪花之後與都令解仇俱着多方解折相機宣諭務
期懷我威德共作藩籬該撫久勞巖鎮朕所洞知封
疆事重還益體厥臣綢繆石畫與內鎮諸臣協奮心
力礪秣兵馬修塞要害倍加嚴重以保無虞所奏多
備火器火藥添買馬匹卽與速議復行

兵部覆敬陳末議本奉

聖旨關外防禦左輔右世祿獨當前矛着各以原官
加級還寫與勅書以示優異奴報緊急着滿桂移駐

前屯孫祖壽移駐山海黑雲龍移駐一片石聞鳴泰
移駐關門其分布兵馬關內四萬關外八萬俱如內
鎮臣議聽督撫作速布置朝於脉絡相連呬呼共應
務保無虞稱朕與廠臣軫顧疆圉之意聞奴兵已越
錦州且薄寧遠錦州兵馬無可退寧遠之守務自清
野固壁相機堵勦該部速傳與他們知道

袁崇煥謹啓當道諸名公職匪材而當封疆之重寄
復遼地而聚遼人爲守蓋遠求難致之兵何如近取
回鄉之衆此不肖爲聚兵計也不虞涵天之虜應我
邊河之聲及於錦夫築錦凌二城秋而畢矣收稼浚

秋我城坐以待虜乃以一東江之故卽聲於河以挑
之何如假一款字以緩之舍彼欲爭而無及我不援
而無患也况所以悞天下而苦邊臣者則東江甚毛
帥每冬冰交則避之遠島天下所知也鐵山所留老
弱及麗人耳今一攻以合毛不能一矢加遺而朝夕
報功人遂易視此吏謂撲之卽滅十年血戰幾能當
其鋒造言生事者欲借毛帥行已私今局已露矣毛
帥避於封疆無害職將何之毛帥卽不勝於金甌
無損職之所守其干係何若而可以國事嘗乎故
敢質之天下

此書用遼人築錦凌款奴酋撒毛帥皆爲禍始

兵部遵旨覆奏本奉

聖旨滿帥出援錦州山海兵力單弱這調發近鎮兵馬昌平調一萬領以總兵李加訓天津調五千領以副將錢中選保定調五千領以總兵王繼着星夜赴關防守山海不許逗遛致悞軍機楊加謨旣係該部薦舉必有心計堪用着齎尚方劒及問寺銀五千兩星馳赴滿帥前以資方畧重彈壓而備犒賞俱如議行○兵部奴氛孔棘事奉

聖旨狡奴西犯不獨關外受敵薊門一帶在在皆當

嚴備着馬上速行宣大各挑選兵馬五千名隨帶軍器火藥擇智勇將領星夜前赴山海以聽督臣調度自山西以至河南山東北直隸地方凡有兵馬處所俱要揀選厲秣裹糧整擄用備緩急該部火速傳與他們知道軍幾重大各宜齊心併赴勿得逗遛以干嚴法○平遼總兵毛文龍奏奴謀極狡等事奉

聖旨覽奏奴孽狂逞叵測既經挫衄渡兵踞鮮復偕西虜闖入秋冬津薊在在宜防喜峰口等處要害埋伏火器堅壁厲秣以待具得制勝先着說得是逃將李鏞李越及鄭繼奎鄭繼武高應詔執法廢紀若不

正罪何以懲衆着內鎮臣同督撫諸臣卽行梟首以肅軍律○毛承祿加副總兵職銜偏師駐皮島用張掎角○滿桂奏報援兵東行爲羣虜攔截於筑籬山奮勇力戰虜死甚衆將令不許割級止有丁自雄於馬上斬一級恐伏不敢窮追陳亡將士羅忠等六十名○工部陳戰守機宜奉

聖旨奴兵旣東戍又西犯中必虛矣海上先速行遙制東西之難可以竝解如此急着登撫毛帥倘聞聲息皆可一面布置一面奏報者立刻馬上差人說與他每知會本中救錦州固寧遠備關門俱係緊務薊

鎮咽喉之處設立標營稅以大將內衛外援俱可相資防之法寓於其中着與商確申飭行

兵部條陳奉

聖旨覽奏說錦州紀鎮忠奮自誓趙帥憑城擊賊多所殺傷已見能守之勲然攻圍不退應援當亟赴援諸將尤宜相機進止以備萬全寧遠撫臣料理有素且威略夙著無煩幫貼深慰朕懷關兵應援這所調鎮兵三萬着急趨赴關以資防守守者以全城爲上援者以退賊爲功說的是其關外四城毋輕調發軍前糧餉作速接濟已有旨了你部還馬上差人不時

偵探有聞立刻入奏○兵部復奏塘報奉

聖旨錦州圍困不容不揀然奴亦度我之必揀爲致
我之策若直赴之正墮其計間道出奇形格勢禁使
奴自退該撫精心籌之許定國饒有智略請兵願往
忠義可嘉着分兵一枝副以健將令星馳自效貴英
等酋不妨便與重賞以啗之此着最緊須速應不必
疑也各該兵將着飛檄嚴催赴關有遲留者以軍法
從事

一解

六月薊遼總督閻鳴奉據總督鎮守太監劉應坤報
本月二十八日午時賊夷數萬來至寧遠東北山下

劄營職卽發令箭催督車營都司李春華等率領勇士對賊安營奴賊連衝數陣我兵奮勇用紅夷木龍虎滅虜等項神器齊力攻打打斃賊夷約有數千尸橫滿地職先布軍令止許砍勦不許割級仍嚴率將領馬步官兵鱗次前進相機攻勦

山海總兵滿桂報錦州被圍已久業經兩次發兵勦殺奴酋前哨勢衆不得深入於本月十九日選差健丁前去錦州哨探情形進城見紀太府趙總兵分付城裏防備甚嚴賊今俱往松杏等處一帶安營暗伏俟有別情另報○滿桂以錦州被困發兵鼓勇前進

奴部執五色標旗於灰山窟窿山首山連山南海分
九營官兵撤進濠內周圍安營有總兵孫祖壽副將
許定國在西門札營桂令副將尤世威嚴整火器預
備望見城東灰塵蔽天賊兵分投前來圍城桂卽親
督紅旗督率各營將領等官祖大壽等迎敵賊傷無
數賊擡尸至雙樹堡西焚燒桂被賊射中數箭桂馬
與尤總兵馬亦被射傷各將安設紅夷滅虜等砲將
東山坡上奴賊大營打開賊死數多自卯至午賊見
我兵力戰不能得前撤兵東去○平遼總兵趙率教
報五月十一日辰時奴子提兵十餘萬騎至錦州城

外四面札營十一日分兵兩路檣拽車梯挨牌馬步輪番交攻西北一面太府紀用同職及總兵左輔副總兵朱梅躬披甲冑親冒矢石力督各營將領并力射打炮火矢石交下如雨自晨至戌打斃夷尸填塞滿道至亥時奴兵拖尸赴班軍採辦窰木燒燬退兵五里西南下營次日寅時馬兵圍城遊走尚未撤兵○巡撫袁崇煥奏十年來盡天下之兵未嘗敢與奴戰合馬交鋒今始一刀一鎗拚命不知有夷之兇狠驍悍職復憑堞大呼分路進追諸軍忿恨此賊一戰挫之滿鎮之力居多

兵部題奴子淡入重地久留不歸蓋欺我兵援者不敢進守者不敢出耳乃今寧遠城下之一戰橫尸遍野錦州城下之攻大敗歸營兩處捷音先後踵至非仗皇上之威靈藉厥臣之區畫何以得此哉當此二捷之後賊氣已阻我氣愈張今雖馳騁於塔杏之間必不敢蟻聚於堅城之下徐而圖之其機可乘第恐頓兵日久錦圍未解又非我利政須勵兵秣馬乘機伺隙以爲必勝之計以收萬全之算至於犒賞有御前銀兩其器物馬匹亦屢經奉 旨行催矣
寧遠太監紀用報賊於初五日在小凌河札營拆毀

小凌河城牆初六日盡赴大凌河折城屢來投降真夷具言奴恨錦州殺傷夷衆大半若留下城牆漢人又如錦城據戰又將廣寧諸城盡折使漢人無據方好上陣廝殺自此逆賊漸東地方無虞

晉爲經略取用趙率教竟成守錦之功其寧城之不墮金啓侗與有力焉事見別傳

總督閻鳴泰題奴雖遠遁勢必復來錦州邊僻與區原非扼塞險要當日議修已屬失策今日錦州止可懸爲虛着慎勿認爲實着止可設爲活局慎勿泥爲死局止可計用以弭敵慎勿株守之以抗敵臣頃至

寧遠密商之內鎮與寧撫其見頗同此番之戰我兵
傷損亦多則今日急務無如補兵練兵爲要聞奴攻
朝鮮得船四百隻而都令色令與黃把都兒近復自
折入於奴倘令朝鮮叛人以片帆渡海新附西虜以
數騎窺關而奴子自率大兵從廣寧故道而來皆計
之最毒而事之不可必者安得不速爲之備而又安
可異人爲之備哉

樞輔惟以築錦築大凌爲實着年來籌畫惟此加
工卒至誤國

兵部奏奴子回巢裹糧而來其欲撓我修築撓我屯

糧明矣但溽暑行兵被已犯兵家之忌我明烽燧堅
清野以佚待勞以飽待饑如上年寧遠嬰城固守故
事且河西食俱已搬運錦州千里而來無所標掠若
奴子不揣深入重地頓兵堅城之下不數日必且狼
籍而歸此時伏兵要害乘其渡而擊之此萬全之穩
着也伏 勅撫鎮諸臣固守城池慎勿妄動避其銳
氣邀其情歸最爲上策云○西虜領部衆報効遣夷
使貴英等請賞

寧遠太監紀用奏逆奴圍困錦州大戰三次大勝三
捷小戰二十五日無日不戰奴賊於城外以是初四

日奴賊數萬蜂擁以戰我兵用火砲火礮與矢石打
死奴賊數千中傷數千敗回賊營大放悲聲隨于焚
化酋長尸骸處天墜大星如半其落地如天崩之狀
衆賊驚恐終夜至五鼓撤兵東行尚在小凌河札營
留精兵殿後臣卽同總兵趙率教左輔朱梅等發精
兵防哨是役也保六年弃遺之戰城一月烏合之衆
兵獲此奇捷爲此塘報

袁崇煥不肯抹錦州。所以有暮氣難鼓之旨。紀用
直前亦畏魏璫之操切也。

御史李應薦題撫臣袁崇煥撐持殘疆拮据數載惟

是假弔修款設策太奇頃因狡虜東西交訐議者遂
嘖嘖嗤爲愚并以不急援錦州鄙其爲蒞此似不可
爲該撫解向後暮氣鼓之實難 准其病歸而優優
叙錄其於撫臣亦庶幾無相負哉

七月奉

聖旨袁崇煥暮氣難鼓物議滋至已准其引疾求去
督臣駐劄薊門亦係重地寧遠督師朕特簡樞臣俾
星馳赴任料理王之臣仍以太子太傅兵部尚書兼
右都御史駐劄寧遠督師榆關兼巡撫遼東山海等
處地方提督軍務 賜尚方劒○閻鳴泰加陞少傅

協理京營○一片石西界忽生鉛鑛 命會同督撫
道開採○錦州生擒賊夷五十九名刑部獻俘傳首
各邊

督餉御史劉徽題頃見寧撫袁崇煥請告奉 旨回
籍矣寧撫素以滅賊自許中外咸思倚重而講款一
節聞者不無詫異說者謂借款爲名撫臣另有作用
未幾一面講款奴且有事於東江攻東未已奴更西
犯乎錦城此時正望撫臣之作用撫臣若無作用之
可自效也樞臣王之臣曩嘗督師時及知款未易而
講不可輕慮貽封疆之憂先爲苦口之藥老臣持重

洞悉虜情不啻燭照數計然者邊臣若此何慮邊事
不萬全哉

兵部題奴酋用都令色令爲向導而窺山海內地皆
勢所必至我當預防斯可無患獨錦州一城原因曷
復河東故預修河西件件做去今則爲奴所必爭矣
遼僻與區無關險要守之則類垣壞壁修築甚難不
守則寸土寸金弃之不易內鎮臣欲留輕兵以防小
修以補賊至則堅壁清野以待卽督臣疏內所謂虛
着活局餌敵之意臣部以爲錦城已守有成效不當
議弃若臨時用以設謀餌敵出奇制勝應聽新督師

熟計而行可也

督師王之臣奏西虜自都令等投奴北邊六七月間
無一夷則我之肩背皆受敵之地矣乃第一緊要全
在糧餉接濟錦州所以能守能戰者食足故也見今
寧城內外肩摩轂擊居無剩地斗米三百餘錢而天
津二運未完三運尚未發動轉盼入冬冰合事無及
矣萬一賊至何以支持旬日乎又總兵杜文煥駐寧
遠侯世祿駐塔山尤世祿駐錦州已奉有 特旨乃
尤帥謂錦州城池遭雨崩頽萬不可居今暫駐杏山
侯世祿謂塔山低凹迫近高山非可守之地其城池

亦且修築未完意欲移置別所臣思各帥信地已定自當有進無退豈得移易地利失險則人心不固容臣臨時相勢酌處其糧料儲備各宜廣宜預不可須臾緩也

閻鳴泰疏今夏錦州之圍臣聞警東馳卽先呼崇煥之叅謀丘磊而秘囑以報曰錦州之守原屬非策今旣誤矣豈容再誤錦卽有得失不係安危惟一意以固守寧遠爲主切勿輕動致墮奴計蓋錦去無損於寧寧一遘則關門震動而天下事不忍言矣

是時奴兵結五大營於塔山一帶以北圍錦而西

三
窺寧我以逸待勞一戰大捷錦圍遂解此兵家所
謂致人而不致於人之法也

吏部奉

聖旨魏忠賢報國心丹吞胡志壯整戎備伍立三捷
之奇功雪恥除兇洗十年之積恨績奏安攘烈茂山
河寧晉彝典昭然世爵褒封允當着廕弟姪一人特
封安平伯世襲○又錦寧之捷蔭忠賢弟姪一人世
錦衣指揮使○紀用蔭錦衣同知世襲王體乾劉應
坤等各加恩世廕

太子少保南京吏部尚書王在晉等疏稱向聞奴兵

渡河臣等焦思蒿目日夕靡寧心懷岌岌若身介其
衝者蓋錦州孤懸絕徼我師之精銳集焉錦城安則
寧遠安山海安首尾情形聯屬一體茲幸斗城壘固
全師凱旋前有寧遠之一擊後復倍其功東有毛鎮
之克揚西復張其烈此皆 順德潛孚百靈呵護邀

祖宗在天之默佑兆 泰圖億萬之靈長是以轉危
爲安用戰爲守臣等屢聞捷報舞抃同情雀躍 嵩
呼曷勝慶慰追惟往事從昔三韓陷沒壬戌之夏始
收復關外五城各堡今幸步步向前兩河版圖可取
大漸復矣昔也謀議定而忽搖委任專而輒易人各

一心事各異意今則號令屹如山岳守者盡懷效死之心接應迅於流水王者常虞後至之罰援師磨集饋餉雲從將數年前遇賊狂奔之肺腸洗滌殆盡合十萬人併力協攻之意氣振發如新此則乾斷勵精廟謨弘遠內而閣部科道外而鎮守督撫道將文武諸臣之肝膽畢照策力兼收共成撻代以昭盛績也然而臣等猶有進焉勝亦兵之常謀居勇之上辨賊之所以退則知賊之所以來來者因糧也去者食盡也沿海之露積豈一炬之可焚而關寧之乏餉曠日之難久今後海運之交割須先儘內地海濱

之暫卸。務轉運城中。而後我飽賊饑。賊必不至。至亦不能久留。彼踰河跋涉牛馬。不能以負芻。我結寨連屯。頭畜預宜以收斂。堅壁清野。以主困客。是爲今時第一義。動以挑之。不如靜以鎮之。先聲以怖之。莫如後實以疲之。惟蓄銳以固其防。勿輕嘗以入其彀。儲火藥精器械。練兵卒。搜奸宄。結人心。是爲今時第二義。溽暑非酣鬪之時。強奴有未盡之技。時至秋淡。則馬肥於草實。弓勁於風高。海颶不便運艘。難於轉輸。秋月倍明。乘宵慮其掩襲。此秋防之當謹也。入冬則輜重可以攝水。胡騎遲能翕渡。島帥難施牽制之力。

凍土易隳繕築之工。霜雪嚴凝。手足痺瘳。彼向陽而
就煖。我怯冷以迎寒。此冬春之可虞也。七城之生命
待食於一綫之餉道。津門之水犀有限。而海天之浩
淼無窮。覺華新募之遠入焉。能慣海。而淮揚所造之
船隻。猶恐後時。毛帥孤屯。必駐師要地。而後可牽點
奴之狼顧。西夷多狡。必永懷好音。而後可固薊北之
藩籬。此俱今日之要圖。而天與我以綢繆修備之暇。
廟廊之上。當悉心講求。時乎。時乎。此其萬不可失者
也。又念各邊之調遣。殷繁而農部之供輸。久僵奴若
再來。必非尋常之戰。須蚤辦軍需。以備臨期之緊用。

預筭其所難而先籌其所急庶不爲臨渴掘井之謀而有當於曲突徙薪之慮此在當事重臣必有成算而臣等淡心惕息輒敢謬佐一籌若夫戰勝而懼好謀以成內外協心將士併力采芻蕘以資謀議核功實以昭勸懲明明在上濟濟在朝自饒爲之臣等無庸喋喋矣

八月登萊巡撫孫國禎題天啓七年四月二十日准平遼總兵毛文龍手本照得逆奴東犯本鎮令南北官兵分路設伏張疑出奇衝截攻勦仍嚴令討敵不許貪割首級打營不許躲避風雨官兵奮勇一勝於

宣州車輦江當溝小鐵山等戰再勝於義州晏庭關
瓊山青龍山等戰三勝於積糧倉千家庄彌川堡鎮
江沿邊等戰四勝於雲從關口龍王宛子本鎮親督
內丁之鏖戰五勝於會哨國王彼此夾攻逼賊於瓶
山之遠戰計各路相機攻殺死傷悍虜無數其各營
官兵鄉縛解鎮男婦活夷當官研審明確等因該臣
看得毛帥孤懸絕島遠泊水鄉溟霧胡風侵肌撲面
寒烟冷月泣晝憐宵七年正月以來五戰而五勝諦
觀宣州車輦義州西門龍山諸役皆令人古咋心驚
色飛神動然義州西門之捷獨雄而奇蓋其俘獲者

皆名酋今之繫紐而獻者此也宣州諸路之捷又險而奇蓋毛帥親中二矢不爲少動自五六年以來大小幾近百戰積俘至四百七十有零搶獲器械馬匹累百近日續報者不與焉據冊獲功將士均當優叙至陣亡官一百二十六員如毛有松等均當錄後陞賞兵丁六千三十八名賈永德等亦均當錄後優恤被傷官八員如馮應舉等被傷兵五百四十二名如王世隆等亦均當優恤者也

海外戰功未必盡核然亦不可盡沒

劉詔陞兵部右侍郎兼右僉都御史總督薊遼

本月江西鄉試策題云任讓之局古人合領之今人分據之吾以爲先定之於品品非聖賢豪傑則富貴功名之途側肩而奔之非迫而起叩而應者矣此房琯殷浩之流任讓兩無所據又巧爲任者他人綽有成效則勢攫以居其功事勢將有可圖則狙伺以邀其便品愈卑而事愈壞天下有不可言者矣未望之遠志難慊衾影旣出之小草有慙輿論幾何不爲千古嗤笑哉

此策題明刺自請行邊者

戶部題都色部落投降督師疏稱弱者自爲食則以

陣亡缺伍之糧養一千七百之精壯而有餘無煩另措矣至於發銀朱餘以養十萬居民則祖宗以來無賜田租之詔臣部卽欲措發而無從前錦州被圍連呼顆粒皆無迫虜敗之後錦州尚餘米三萬數千而奴營沙鍋中率存漕米飯此人之所共知也督師習知臣部之苦必明以入告庶中外相成兵食兩足矣

督師王之臣題三軍之命係於一將今山海有滿桂寧遠有杜文煥塔山有侯世祿錦州尤世祿前鋒朱梅各奉有專勅旗鼓相望可謂極一時之盛矣然

權不歸一令出多門未見其便文煥家世將種久歷
西郵亦將中之白眉也而遠左情形非其所長滿桂
自恢復寧遠以來卽在此料理而夷情邊事瞭然胸
中虜中嚙指亡不知有滿將軍者文煥縱有經理之
名而尤侯諸將原係鄉里親友各奉勅印誰肯相
下滿桂晉秩宮保各位已崇且原奉勅劔得以節
制四鎮者今調文煥於關內調滿桂於寧遠俾節制
如故則上下人情久協無難收指臂之功矣

十月間鳴泰以少師兼太子太師兵部尚書回部管
事○撤鎮守內臣其戰守機宜俱付督撫諸臣膺任

八月二十二日

熹宗愍皇帝崩

二十四日

今上登極以明年爲崇禎元年

九月督師王之臣題職於七月內未出都門卽聞西虜都令色令等攜帶部夷二萬餘人投順東奴心甚慮之幸奴子不卽收納致令徘徊河上而部夷窮餓多鳥驚獸散此其必致之勢也初都令等聞虎酋之欲謀已也忿激離巢其投足未定之時諸頭目願向天朝副將朱梅差通官以書招之都令亦欣然欲來

後聞虎酋兵動恐天朝不能庇決意投奴比奴疑
忌未敢寄跡於瀕河諸處時部落多悔恨輕離故巢
紛紛逃叛都令知覺追逐遂致各夷倒戈然其投虎
者十居四五投我者纔十之一耳今樞臣長慮却顧
仍欲置之故處給以原賞是矣彼若故處可居雖招
之豈能使來今附我而我拒之彼必不敢西歸仍必
東投奴子我方欲空其所有安可益其所無當各夷
未至職集各官計議如朱梅王牧民祖大壽皆老於
邊事熟於夷情者咸以爲此計不可失也議者鑒瀋
陽覆轍惴惴焉不知瀋陽之收降也經臣遍掛招降

之旗諸虜乘機蜂繹來歸兩月之間填滿瀋城所謂
引虎入門有不噬人者乎今諸夷窮蹙未歸我可藉
之爲用旋而却之是因噎而廢食也且兵家事原不
可執着即使諸夷而果詐降也我亦當以別法制之
寧可放虎近山乎錦州僻在寧遠之東北原非重地
原不必先宿重兵祇因前任總兵趙率教嗜屯利故
以兵屯之堅持和議謂奴決不西來豈知方金納馬
首方東而賊兵已圍錦州矣自虜退後業已弃其田
疇毀其廬舍士民商賈席捲而歸寧城則錦州之景
象可知因令前鋒三將在彼略加修葺俟明春修完

通鑑纂要卷之二十一
城及軍火器械而後可守錦州尤世祿分署信地也
今尚趑趄於杏山不敢輕往茲欲以紀用鎮之是以
朝廷之貴臣爲餌於虎牙間必非萬全之勝算也○
登州報叛賊李永芳故

十一月撫寧侯朱國弼疏云奴賊與我深仇而及其
死也魏忠賢乃遣人弔孝白送却無數金珠反取煖
書一紙邊臣不奉忠賢之命敢徑爲之乎此則敗壞
邊事之實又不惟是也喜則升九天柳河之敗得以
鑽刺而喬遷羨乾父一認之有靈其顛倒錯亂遂至
於此○戶部主事陳此心疏稱寧錦一捷不過解城

下之困圍未復侵疆之只尺止可免罪豈可言功魏
忠賢欲藉此廣茅土以自張內翼故槩加諸臣銜秩
世廕以相羈縻耳獨不援在廷諸臣之例加一級
賜一廕於數載扞圉之舊撫袁崇煥乎幸有讓廕之
霍維華尚存一綫公道於人世而忠賢旋促之以去
餘又何敢言哉

兵部尚書閻鳴泰題壬戌監軍之役臣任關內袁崇
煥任關外傾蓋如故無言不投每每月下燈前靡不
抵掌促膝共計滅奴一時去事如舊經臣王在晉輔
臣孫承宗督臣王象乾復傾心相交降心以從遂舉

趙率教以守前屯舉祖大壽以守覺華島並寧遠城
闢草披荆招携懷遠漸築首山以西二百里已失之
疆場始復歸我版圖矣當日夙夜拮据之勞炎霜馳
逐之苦赴七尺於彼蒼期一當以報國恨不唾手
黃龍共一痛飲至今年久悉丟則愈冷人數易則愈
生誰復有知而念之者唐詩有云鋤禾日當午汗滴
禾下土誰知盤中飧粒粒皆辛苦又云昨日到城市
歸來淚滿襟徧身綺羅者不是養蠶人臣每讀至此
未嘗不悽然泣下今一重門限安於泰山其飯盤中
之飧而披羅綺之華者不知其幾矣亦知當日鋤禾

養蠶之苦乎

讀此疏憶當年始事之艱直堪淚下熊王入關遼
兵大潰人衆擠軋關門不得闔者四晝夜此時已
無關矣廷推經略何人敢任晉爲國心殷單
車就道守前屯寧遠等處皆晉任內事也樞輔代
之則防守已大定矣彼監軍勞苦尚爾自陳而况
爲經略者哉所云人數易則愈生洵爲確論彼時
朝論不搖邊臣久任卽不能滅奴奏績亦何至有
虜犯京城西夷盡叛塞外皆爲敵國乎

遼事實錄卷之十七 終

三朝遼事實錄跋

曩遼患孔棘家大人拮据中
筯蓐食行間殷憂宵旦不遑
寧處苾小子時得而親承焉
已已歸里每得報輒廢書而
歎曰有是哉邊事一至此極

乎兵虛而不可恃也餉靡而
無可覈也效順之虜昔爲我
用而今爲奴用也長邊數千
里在在可窺而入也蓋自壬
戌以後關寧失馭其所繇來
者漸矣追惟河西奔潰胡塵

滿目犬羊充斥流離載道鴻
鴈哀鳴天造草昧紛紛攘攘
渝關爲劍戟之場矣彼時寧
前不復則山海危山海不守
則

神京危舉

朝胸膈而家君挺身仔肩以愧
夫臨事怯避者銳志爲收復
寧前之議以愧夫奔蹌失地
者不請兵不請帑單車就道
以愧夫多方請乞者比出而
經畧欵誓相兼戰守互用關

前殘破之區重歸版籍而棄
甲曳兵者忤矣無刺無非倏
更倏代言者無已而自請行
邊督師者妬矣於極危極險
之地百難百窘之時幸不蹈
前車之覆轍留樞簡任三告

乞歸家君曰此

社稷之靈也

君之福也臣何功之有角巾私
第口不言功而爲公論所許
可復拜南銓之

命無何而權璫竊柄獨行見忤

屢推屢黜以至三載之淹瑯
殛而始正中樞之席焉是時
邊防竄情業五載於茲矣當
袁督師之

陛見

御前矢口輕言滅奴因箴規之

相咈遂謀議之參商必欲易
本兵以恣行其臆於是諫垣
有水火之談而儉壬任苞苴
之入債帥逋誅之䟽投鼠起
憎而

召對欺藐之

旨批鱗觸忌偶緣惠安之增

勅蘿葛株連瞥然投劾而歸矣

藉令家君在任則薊兵不至

抽單島帥何繇立猝插部不

遷素囊不滅而西虜不背約

以從奴詎至陰許和而陽赴

援有引虎入門之禍哉老父
年齡薄暮願不知名子情喜
懼交切惟知愛日身之隱矣
何用文爲顧念虜患披猖

君父蒿目十年遼事草野僅聞
其繁史乘恐失其真斷簡殘

編悉從邸鈔中之纂集梓人
乞付剗剗皆剗浮摭實之文
無虛無贗董狐齊太史或取
徵取信焉昔孫盛作春秋而
子孫環向泣請更竄今當
國步之多艱公論之翕叶有二

三策之可收無五湖長之見
嫉枋頭之失年未遠而人盡
知之事不必諱卽諱言奚裨
于已然之失策也父操筆而
稽

國是子攝衣而讀父書不識有

當于編摩之一得否謹以書
之簡末

崇禎己卯上巳日男會茲謹跋